

四庫全書

史部

欽定四庫全書

浙江通志卷二百二十三

祠祀

金華府

金華縣

附郭

先農壇 在東關外距城三里

國朝雍正五年知縣趙元祚奉文建立壇宇并置藉田

四畝九分

社稷壇 萬曆金華府志在府治西北三里許

舊浙江通

志金華縣附

郭不別置

風雲雷雨山川壇

萬曆金華府志在府治南六里

雙溪之南

郡厲壇

金華府志在府治北關北三里許

城隍廟

金華府志在府治北四隅二里明洪武三

年建弘治間知府郝隆重建嘉靖間知府陳京修

國朝順治戊戌知府孫丕承知縣王世功重建

金華縣城隍廟 金華府志在通遠門內距縣南三

百步

夏禹王廟 萬曆金華府志在通遠門外雙溪驛後
關帝廟 金華縣志一在東一隅一在文昌閣

赤松祠 明一統志在金華縣東二十里晉黃初平

初起登仙於此後人為之立祠號赤松宮 舒道紀
二仙祠

詩松老赤松原松間廟宛然人皆有兄弟誰共得
神仙雙鶴冲天去羣羊化石眠至今丹井水香滿

北山
田

徐將軍廟 名勝志在子城西一里晉人名佚督兵
來婺平賊有功後葬於此昔年於廟左浚渠有古
冢無碑碣惟存一鏡甚損上刻永和年號

康濟廟 萬曆金華府志在府城北十五里即今東
紫巖廟神姓邢名植凡有祈禱累著靈驗宋嘉定
中封剛應廣利忠祐侯

三蘇祠 金華府志在縣東景蘇坊內宋建炎二年
穎濱長子遲以右朝議大夫來知婺州為民奏減

羅額父老德之為立生祠并祀老泉東坡潁濱三先生明正德間重建增入待制遲學士簡神位

三忠祠 萬曆金華府志舊名二忠祠祀宋宗忠簡澤明王忠文禕在八詠門外正德十二年建隆慶壬申知府鄭一信改建清波門內萬曆二年巡按御史蕭廩以贈太常少卿陸震合祀更名三忠

鄭忠愍公祠 嘉靖浙江通志在縣東北三十里祀

宋資政殿學士鄭剛中

金華縣志在坦溪上公裔孫貞建又赤松鄉寶積觀

亦有
公祠

呂成公祠

金華府志在府治西光孝觀內宋端平

間立祠元大德燬明嘉靖間重建後遷於分守道

署右

國朝順治年間守道周漢傑畢振姬重葺康熙十六年

知府張蓋重建

越國胡公祠

金華府志明洪武初祀忠臣胡大海

宋濂胡越公新廟碑記辛卯兵興上手秉黃鉞屯
兵滌陽公仗策謁轅門一見語合遂居前鋒以佐

揚天威辛丑夏五月上憫公之勞且以發為海右
大藩連甌引越非有宿將重臣控制之不可乃授
公江南等處行中書省叅知政事屯戍於發壬寅
春漢洞兵叛而西歸公遂遇害上聞之震悼勿置
親御翰墨作文以祭且命有司塑公像配享卞忠
貞公廟庭甲辰冬復降旨贈光祿大夫浙東等處
行中書省平章政事柱國追封越國公先是公歿
之明年公之部曲與境內之民悵然遐思乃相率
即城中作新廟一區及是寵頒之命下復羣謁於
金華宋濂請記濂竊觀古之名將出戍邊域者矣
苟得甲士之驩心則耕田鑿井之氓必至於弗寧
使斯民稍得以遂其生則持戟荷戈者必不免於
愁怨孰有能兩全者哉若公者可謂賢已公嘗自
謂曰我不知書然吾行軍惟有三事不殺人不自
掠人婦女不焚人廬舍故其軍一出遠近之人皆爭
趨附益公處心以仁蒞事以威惟其仁也故不言

而民化惟其威也故不待戒而兵自不敢犯廟而祀之其誰曰不宜初公之未薨嘗夜出人見其兩目煜煜有光若燈及既薨敵人數入我邊陲公降異或見夢於人或覩靈火滿野洶洶聞人馬聲洎出師輒大捷似實有陰助者是則公之英魂烈爽下上於天地之間固未嘗亡也

景泰間

以贈浙江布政司叅政陶成配享嘉靖間同知李重重建於八詠門外隆慶壬申知府鄭一信改建於清波門內

國朝順治年間祠圯止設像於八詠門樓

宋公祠 萬厯金華府志舊祀學士宋文憲濂祠在

八詠門外東城下嘉靖十三年巡按御史張子立
建隆慶壬申知府鄭一信改建於清波門內萬厯
二年巡按御史蕭廩以唐文襄公龍合祀

唐文襄公祠 金華府志在府治西明嘉靖三十九
年建

忠義節孝祠 忠義祠在城西五隅學宮西首節孝
祠在城北三隅

國朝雍正四年知縣趙元祚奉文建

蘭谿縣

先農壇 在縣治東門外距城半里許

國朝雍正五年知縣胡啓敏奉文建立壇宇并置耜田

四畝九分

社稷壇 蘭谿縣志在城北石壇山

風雲雷雨山川壇 萬曆金華府志在縣南一里倉

嶺之後山

邑厲壇 萬曆金華府志在北門外五里

城隍廟 金華府志在縣西北宋崇寧四年縣尉陸
和中建元至元中知州梁棟重修明洪武三年於
鎮守千戶所故地作新廟成化十六年知縣唐韶
又新之

橫山龍王廟 蘭谿縣志在縣西南宋紹興九年因

禱雨建元至元二年州判王鈺又禱重建

柳貫橫山龍王

廟記發衢二水合流而下為蘭谿治城占水之東
而直其西南有山橫障衢水之衝者橫山也水方
湍悍而巖涯扼之泓渟灣洄滙為深淵有神龍潛
於其中出光景騰雲氣蓄洩雷雨而潤澤羣物其

為造化之府章章異哉故有龍神祠比歲因廢不舉重紀至元二年夏秋不雨籲於明神甘澍滂流四境既足廟而祠之迺記而著之石

福祐廟 蘭谿縣志在柱竿山宋童剛記云楚范增

廟晉天福間有石像呈異故廟於此水旱灾疫有

禱必應

忠祐廟 萬厯金華府志舊在縣南五里祀隋大司

徒陳果仁後遷聖壽寺旁

柳貫忠祐廟記造化之迹百物之精神之著也

然而禦災勤事亡有不仁稽之功藉質之祀典百世雖遠明靈赫然尚皆天隲民衷之不能自已焉

忠烈廟神生身季子之墟顯仕隋唐之際志將靖國蹈難死忠即鄉建祠累有封號而蘭谿別廟民尤謹於報事則以義寧之初常奉詔南平婁世幹之亂戈矛所次氛祲肅清保境綏民功在人心尸而祝之與社稷等合於祭法以死勤事而能禦災捍患者矣延祐五年天子重命廷臣之請肇加爵號之榮命始下耆稚歡呼潔牲薦告神既顧欣人用閭閻里民趙璇嚴繼輝將募雲漢之章刻石貽永迺來請誌輒書

梗槩係次下方

靈源廟

金華府志在縣西五里宋太始初建州刺

史徐燦與夫人密氏舟至蘭陰山下覆溺後著靈

應故祠於此宋宣和中陰有捍寇功封積慶侯

趙清獻公祠 萬厯金華府志隆慶初建在平康橋

北祀宋趙抃

范香溪祠 嘉靖浙江通志嘉靖二十二年建祀宋

儒范浚歲春秋祭金華府志在倉嶺側

陸鶴山先生祠 嘉靖浙江通志在澱水驛西嘉靖

元年建祀贈太常少卿陸震

姚文焯鶴山先生祠記武宗事遊巡伏闕

者至二百人惟公為倡杖至死者十一人惟公為烈公不列諫垣而以身定國上逆天威可不謂難乎先是公出宰泰和泰和之民懷之為樹生祠以祀今大司馬漁石唐公以柱史巡江右移檄蘭

谿俾做泰和之制於澗水之陽創祠春秋為奠而
公之精爽有適矣甫及十年已就支倚文焰來守
是邦大以為缺於是拓址使袁撤材使浙
寢以妥靈堂以秩禮庭除既闢垣宇益崇

章文懿公祠 嘉靖浙江通志祀禮部尚書章文懿

懋嘉靖元年建金華府志在天福山南文懿公宅

傍

邵寶章文懿公祠記先生壽終於蘭谿里第遺
言勿干身後恩澤明年嘉靖紀元春三月將葬

見素林公以應召過蘭谿弔且哭焉曰古者鄉先
生歿祭於社禮也先生天下士以義而專祠之不
亦可乎於是金華郡守王侯九峯語其貳張侯齊
侯鳩工聚材即其第之西南營焉中為堂四楹前
為門如堂之數兩序傍翼綠以周垣中
立神主而顏其門曰楓山先生祠堂

忠義節孝祠 忠義祠在學宮頭門內節孝祠在城

六坊朱家鎮頭

國朝雍正四年知縣胡啓敏奉文建

東陽縣

先農壇 在東郊一都一畝

國朝雍正五年知縣龐璽奉文建立壇宇并置耜田四畝九分

社稷壇 東陽縣志在西關外二里六十四都名社

山頭

風雲雷雨山川壇 萬厯金華府志在縣西南三里

邑厲壇 金華府志在縣西北二里

城隍廟 東陽縣志在縣治東五十九步宋紹定三

年勅賜廟額端平三年勅封顯應侯俗以五月十

五為城隍誕辰

曹冠東陽縣城隍廟記郡邑之祀城隍其來尚矣元豐辛酉知縣施

構因衆重修宣和壬寅邑長裘移忠度材再建多
歷年所官於茲者欲撤而新之未遑也淳熙十六
年縣丞三山黃起宗令尹濮邸趙善讚協誠勸助
經始於夏告成於冬命之以祝史贊之以牲牲至

誠感通洋洋如在爰
紀歲月以誌於後

興孝祠

萬厯金華府志在縣西祀孝子斯敦許孜

許生馮子華應先唐君祐東陽縣志宋端平二年

知縣林嘉會建

二孝子祠

金華府志在縣西南三十步祀斯敦許

孜宋政和二年知縣張述建

申屠將軍廟

金華府志在懷思鄉祀宋邑人申屠

大防

許府君廟 萬歷金華府志在縣南四十里祀宋邑

人許瓊

柳貫許府君廟記府君晉許孝子孜之裔孫諱瓊字世英宋宣和間盜兵徧城府君

以戰歿屍僵立如生猶能載所乘馬馳歸家明年降於鄉曰為廟祀我巖關之陽自巖關有廟二百餘年於茲府君之有德於民與民之有報於府君誠之至而禮之盡也舊廟位置湫隘八世孫熹常議改作未及為而卒於是其弟熊取為己任而熹子怡尤能承志以相其成焉

冲素處士祠 萬歷金華府志在縣西二里許祀邑

人張志行

許應隆冲素處士祠記勅號冲素處士張志行窮理樂道三聘咸辭具輔世之

材蘊光養浩王侯不事高宗以莘野南陽待之其人其行非他可及者也淳熙中邑令曾賁合祀於

學今奉特祀卜地鳩工伐木於山取材於原不闕月而廟成呂祖謙冲素處士銘處士諱志行字公擇八行先生州里之所通稱冲素處士朝宁之所旌號也為之銘曰粹然之行奕然之文三辭微辟天子不臣嘉遜林泉富貴浮雲窮理樂道絕類離羣操堅冰石德達穹窿先正典型昭代儒宗遺祠翼翼流水淙淙風稜百世高節清風

李正節侯祠 金華府志在縣西祀宋蘄州刺史李

誠之

宋贈正節侯廟勅蘄春介在疆場所恃以為險者六關也朕命蓋臣往專備禦之責而措

置踈畧負我使命爾誠之儒生之望分符守蘄以孤城而櫻敵鋒蓋亦難矣慷慨激烈盡其命義闔門死難朕甚痛之乃加論譔仍躡崇階爵之通侯謚曰正節廟食茲土方豪李正節侯祠記李公誠

之盡節於嘉定十四年三月十七日事聞朝廷詔立廟額曰褒忠明年東陽令陳仲孩建廟於邑之西橋頭淳祐間縣令趙崇堅又以沒官田二十畝充祭品明正統間廟燬於寇正德甲戌按察使李承勛及叅政顧璘郡守劉蒞屬前令胡劬才重葺之適內召功未畢而李公邦直以嘉靖五年至捐俸興復李春榮褒忠廟詩半壁烟塵感孤忠日月明當時輕一死百世凜如生廟貌青山古源流碧澗清平生亦許國不敢墜家聲

忠勲祠 東陽縣志在縣西明萬曆六年兵備道徐

棻建祀常熟縣死事太僕卿王公鈇二十年郡守

陸淳申請祭典歲以二月戊日致祭二十四年縣

令郭一鶚修復為之記

忠義節孝祠 忠義祠在縣東學宮西隅節孝祠在

城隍廟西

國朝雍正三年知縣龐璽奉文建

義烏縣

先農壇 在東郊三都一畝井頭趙地方

國朝雍正五年知縣韓慧基奉文建立壇宇并置耜田

四畝九分

社稷壇 義烏縣志在縣西迎恩門外一百步

風雲雷雨山川壇 義烏縣志在縣南四里

邑厲壇 金華府志在縣西北半里

城隍廟 義烏縣志在縣西北儒學右明洪武三年

知縣張永誠建萬曆二十四年知縣周士英重修

國朝康熙二十二年知縣辛國隆重修建鐘鼓樓

永慕廟 萬曆義烏縣志祀秦孝子顏烏在縣東四

里孝子墓左宋端平二年右丞相喬行簡奏賜今

額景定三年縣令李補始作廟義烏縣志明洪武
後屢修屢廢萬厯元年知縣梅淳即故址重建以
宋孝子樓蘊明孝子龔曇配享春秋二祭又設顏
公父神位於寢室祭之日并奠

孝馮祠 萬厯金華府志在縣南四十里唐馮子華
孝親廬墓有靈芝白鹿之祥朝廷表其門號孝馮
立祠祀之

順應廟 崇禎義烏縣志在縣東北四十里清潭山

下神姓樓兄弟三人有智勇為鄉里雄唐末黃巢賊衆經其地率弟及鄉人禦之戰不勝恥為賊得遂自刃二弟相繼戰沒衆德之各於沒之地廟祀銅坑與普濟院前乃二弟廟也宋熙寧間賜額

忠賢祠 金華府志在縣治後舊名四賢祠明嘉靖

二十二年建祀宗忠簡澤徐文清僑黃文獻潛王忠文禕萬曆二年巡按御史蕭廩增入龔忠愍泰

改名忠賢

梅淳忠賢祠記予忝令義烏於忠愍公宜建專祠以祀而必合祀於四賢者何

邇邑之先若宗忠簡之憂憤徐文清之剛毅黃文獻之學術王忠文之貞烈彭彭較著人皆仰之今考忠愍自少苦志力學從宋潛溪先生門人宗思睿遊源流正矣仕洪武間廉慎勤敏人用畏服功業偉矣事建文為都給事中數陳治道議論剴切靖難師渡江知國事不可為遂與其妻訣自投城下以死節義著矣嗚呼四賢往矣微龔公孰與繼美哉五公雖生有先後事有常變身有死生然賢者必忠忠者必賢同歸於道而已以之合祀誰曰不可

宗忠簡公祠 義烏縣志祀宋宗澤初在滿心寺內

元時建明正德十三年徙寺為學宮祠廢隆慶五

年知縣歐陽柏即二都舊祠增葺以祀

黃潛宗忠簡公祠記

義烏滿心寺鐘記宋名臣忠簡宗公之文也石毀弗存已久寺僧曰直曰謚實公七世諸孫直先示寂謚今以甲乙之傳嗣為住持爰撤其衣孟之資購田若干畝祠公於西廡探家集得舊記重刻諸石而俾某志於下方公墓在鎮江之京峴山而立廟於鄉郡從祀於邑庠並著於有司之彙典謚之生上距公歿二百餘歲且去家為浮屠而不忘乎賢其賢親其親祠事之興又禮之以義起者也某是用序次其作始之自焉

徐文清公祠 嘉靖浙江通志在縣南四十里清德

鄉祀宋寶謨閣待制徐僑萬厯義烏縣志宣德初

嗣孫徐季德率族人又創祠靜安里橋西

黃文獻公祠 明一統志在義烏縣治西祀元黃潛

王禕黃文獻公祠記公以精純之學羽翼聖學以
典雅之文黼黻人文誠一代之儒宗百代之師表
義烏乃其鄉邑建祠致祭於禮為宜縣令胡侯既
哀公文集鉸梓以傳復因門人里生之請掄材度
址岡作祠市擇吉壤繡湖之東為祠宇三楹而肖
像其內癸卯正月甲辰落成之年月日也宋濂黃
文獻公祠記烏傷黃文獻公方姓母夫人夢大星
煜煜然墜於懷及其生也繡川之水為之一清是
蓋星靈川祥所融凝而成者故公遂以文章鳴一
時侍講經筵闡明聖學掌宣皇制黼黻太平人文
化成之效於斯為盛是則公雖薨而其耿耿不沒
者固已遊神太清在帝左右而祠之不設非闕典
歟濂梁胡侯來為縣築祠於繡川之濱堂庭穆如
門廡清謐像設有嚴丹雘焜耀而公之靈爽永有

攸棲矣初祠之成同門友王君禕既為紀其歲月
公之子弟又請濂詳其事於石以昭侯之善與此
祠相為終始按春秋書事之法辭有
重複而不殺者因竊取義而為之記

王忠文公祠

金華府志在縣南青巖山祀明王禕

吳寬王忠文公祠記明興以文章用於時者多藝
產若學士宋公景濂待制王公子充尤稱傑然者
二公之在館閣惟以文章為事人以文士目之久
矣一旦王公奉使西南裔而仗節以死然後知公
之學有用也正統六年贈公學士謚忠文曾孫
進士曰汶者作家廟奉公為百世不遷之祖

龔忠愍公祠

義烏縣志祀明都給事中龔泰在城

南河濱

商輅龔忠愍公祠記忠臣龔君浙之義烏
人投水死節其子永吉歷官禮兵二部侍

郎尋轉南京大理寺卿追惟厥考與孝孺方公同節悵然遐思成化丙辰春爰命冢子潼掄材度址建祠於南濠之濱構寢六楹夾以兩廡樹以中門割田四十畝以供祀事落成之日永吉屬予勒辭廟石君字叔安厯任戶科都給事中壬午六月靖難師渡江令公巡城公與其配傳訣曰國事至此不可為矣吾分必死爾第賚勅攜幼以歸急則俱溺於井毋自辱也須臾火起內庭公馳赴之道遇兵校執送金川門驗非奸籍中人釋之公遂自投城下而死是月十三日也厥後賜謚忠愍因扁其祠曰忠愍公祠

崇德褒功祠 萬曆金華府志在縣南馬塘山之原

成化八年建祀侍郎龔永吉

忠義節孝祠 忠義祠在縣北儒學之左節孝祠在

忠義祠左

國朝雍正四年知縣韓慧基奉文建

永康縣

先農壇 在東門外東郊

國朝雍正六年知縣鄔銓奉文建立壇宇并置耤田四

畝九分

社稷壇 永康縣志在縣西二里西石山

風雲雷雨山川壇 永康縣志在縣東三百步

邑厲壇 萬曆金華府志在縣北一里

城隍廟 永康縣志在縣西百步宋建元因之明洪

武二年知縣何弘道重建正統十四年燬於寇景

泰三年知縣何宗海重建

故鄉廟 萬曆金華府志在縣西二里鄉民為梁縣

令何炯唐知縣周某王某建周王名逸俗呼三長

官祠蓋久任而遺愛者

赫靈廟 嘉靖浙江通志在縣東方巖山祀宋兵部

侍郎胡則

胡廷直赫靈廟記廷直四世從祖尚書兵部侍郎保定公於婺州為鄉里婺之

人廟公於方巖歲時奉祭甚謹紹興三十一年廷直為建安縣丞請於上賜廟額曰赫靈明年二月命下廷直跪拜伏讀至於感泣謹齋祓稽首而記之先保定公由儒業登顯仕八典藩郡為良二千石七按錢穀為能刺史出入禁闥為名從臣開國建功生有榮焉始公被天子知遇申命進秩乃奏免衢婺民身丁錢到於今受其賜自公之薨謀報無從即絃誦之所廟而食之歿有靈焉公於平生之志可謂盡矣宣和中盜起清溪保險方巖弄兵踰月王師不能下首惡夜夢神人飲馬於巖之池是池盜實怙之以濟朝夕平明往視已涸矣其徒駭亂大兵一臨即日平蕩由是邦人事公有加於

他日若水若旱若疫若癘有求無不應有禱無不
答赫靈之賜於義為大公蒙報祀之典可謂至矣
先是賊平廉訪使王導以聞封佑順侯倉卒不審
止用方巖神奏而逸其名氏衢婺之人凡厥祀事
版祝旗幟皆實公為佑順侯從舊也繼而闔邑之
士狀於有司廷直於公為孫也詎宜緘默於是詳
述始末力請正名自天發號繫公之神載忻載享
顧廷直才不幼不敢自任論譔亦庶幾由此以明
其善之
萬一也

麗澤祠 萬厯金華府志在縣東北四十里壽山祀
宋朱熹宮祖謙陳亮明王守仁姚文焯

忠義節孝祠 忠義祠在學東射圃故址節孝祠在

縣治西義學故址

國朝雍正五年知縣張啓禹奉文建

武義縣

先農壇 在東鄉童爐地方

國朝雍正六年知縣楊維清奉文建立壇宇并置耜田

四畝九分

社稷壇 正德武義縣志在縣西書臺門外

風雲雷雨山川壇 武義縣志在縣南二里一都雙

路亭之下

邑厲壇 萬曆金華府志在縣北二里

城隍廟 正德武義縣志在縣西一里許宋建炎三

年建明洪武五年知縣徐岳重建弘治元年修

國朝康熙二十七年燬縣人募建正殿知縣江雷篇重

建後殿

任公廟 正德武義縣志在縣西一里長安堰上唐

光化元年邑人任雷築堰引水溉田萬餘畝歲久

堰廢宋慶元四年邑人高世修葉之茂修復仍立
任公祠於上配以五代周鮑二使君蓋亦有功於
堰者

呂成公祠 金華府志元在儒學明倫堂西明正德
十一年縣丞潘棠撤東岳神像以祀公武義縣志
廟廢移主道院萬曆十九年知縣陳大烈復建於
嶽廟之西

都司廟 武義縣志在縣西二十里祀明都指揮使

脫綱守禦千戶周義與陶忠烈同禦栝寇鏖戰殉
難土人立廟祀焉

王孝子祠

武義縣志在東嶽宮左祀明孝子王世

名後圮移建五聖堂春秋二祭

傳詳孝友

忠義節孝祠

忠義祠在儒學右節孝祠在北門大

倉左

國朝雍正四年知縣楊維清奉文建

浦江縣

先農壇 在東門外一都二保地方

國朝雍正六年知縣袁皞奉文建立壇宇并置藉田四

畝九分

社稷壇 萬厯金華府志在縣西北三里趙汝騰重

修社稷壇記宋紹定初令李知退昉舊址壇土為

壇後圯端平三年令鄭思聰易墀而甃之壇壇一

新浦江縣志明萬厯四十三年知縣黎弘道重建

風雲雷雨山川壇 金華府志在縣西南二里明知

縣黎弘道重建

邑厲壇 浦江縣志在社稷壇之東北

城隍廟 浦江縣志在縣南隅儒學舊址宋元符二

年知縣周彥明建新廟在縣南百步明正德七年
知縣鄒輓遷今所

國朝順治五年知縣韓文明重建正殿并兩廊

靈濟廟 金華府志在縣南十里祀白石潭龍王

五賢祠 嘉靖浙江通志在縣學文廟西南元至正

十年建祀陳孝子太竭梅助教溶梅尚書執禮王

少卿萬柳待制貫

鄭濤書五賢贊後初縣學有祠祀節愍梅公忠惠王公及凡宣

勞於學者皆設立其中達闕

尹蕭侯文質以其混淆也屬教諭祝君應昇圖所以易之應昇乃於廟西南偏別闢一祠以奉公而益以孝友陳公文學梅公待制柳公通號曰五賢祠且懼後生小子不知五賢之詳復請戴君良為之贊刻石祠中

黃大夫廟 萬歷金華府志在縣西二十里祀黃仁

環浦陽人物記宋建炎元年山賊何三五作亂仁

環以計擒賊官至訓武郎縣人感德立祠祀之

二賢祠 萬厯浦江縣志宋紹定知縣李知退建祀

梅節愍呂成公

李石二侯祠 嘉靖浙江通志在縣西宋會稽李知

退新昌石孝陔相繼為縣令士民懷而祠之元至

正十二年重建

宋學士祠 金華府志舊在青蘿山後遷儒學南

薛應

游宋學士祠記潛溪宋先生生於浙之浦江卒葬於蜀之成都成都則既有祠祀矣浦江顧獨缺焉百八十餘年莫有為之舉者迺高淳韓叔陽氏出知是邑之二年為嘉靖庚戌建祠祀之仍樹碑以

紀成事王疏過青蘿山宋文憲公祠詩乞恩纒許
致鑿坡魚水雲龍竟若何一代衣冠周禮樂百年
盟誓漢山河秋風歸雁衡陽少夜月啼鵲劍
水多回首故鄉何處是蕭蕭遺像守青蘿

忠義節孝祠 忠義祠在學宮名宦祠側節孝祠在
東門外元武殿側

國朝雍正四年知縣袁皞奉文建

湯溪縣

先農壇 在東門外

國朝雍正六年知縣任之俊奉文建立壇宇并置耜田

四畝九分

社稷壇 萬曆金華府志在縣西北二里

風雲雷雨山川壇 萬曆金華府志在縣南一里

邑厲壇 金華府志在縣北半里

城隍廟 湯溪縣志在縣西儒學右經始修葺莫詳

國朝康熙間知縣柯弼鼎新之近年寢殿傾圮邑紳張可元重修子祖年又捐田收息為久遠繕修之費每歲四月望後一日相傳為神誕辰

白砂昭利廟 金華府志在縣東三十里吳黃武六

年建以祀漢盧文臺

杜嶼白砂昭利廟記白砂之堰三十有六首街輔倉尾跨

古城蔓衍磅礴其為田不知幾千萬畝民受其利無有終極而白砂之靈眈侯實主之侯姓盧氏漢末討赤眉有功功嘗顯矣而其詳不可得聞也娶之南有山名輔倉者林麓蔥蒨水石潔清侯墾田以居號盧坂既歿葬焉因遂廟食其地吳黃武六年三月大水廟之香火漂至白砂居民范氏請諸官官請諸朝吳王命諸葛恪覈其故不誣乃許建廟赤烏元年旱鄉民謀開堰引水以灌稻田鉏畚所及纔三十步巨石轟然隱地役夫斂手乃禱於侯一夕大雷震以雨空中洶洶咭喊聲迨明石已開三十六堰實基於此唐僖宗封武威侯錢氏有土封保寧侯政和二年守袁灼有請封靈貺侯于

石白砂廟詩百戰功收老故山寒溪怒湧白沙泉
雲臺不與四七將廟食可傳千萬年香冷誰能然
漢火水流空自灌吳田愚民不
識前朝事浪說神能駕鐵船

侍郎廟 萬厯金華府志在縣北六里祀唐侍郎徐

安貞

靈應廟 舊浙江通志在縣南十里地名山口祀陳

府君宋慶元間封威惠侯

二賢祠 湯溪縣志在大安殿側祀宋楊船山王魯

齋

陶忠烈公祠 湯溪縣志祠有二其在縣治者已廢

此為公死難之所地名山口

王直陶忠烈公祠記忠烈祠者故浙江按

察副使陶公成之祠也正統戊辰冬處州麗水諸縣盜起巨猾陳諫胡等為之倡金華屬邑多逼賊巢數被害而蘭谿又為金衢嚴杭要地蘭溪有警則諸郡皆震公時為僉事當禦寇之任用計畧擒殺賊黨數百人計日平定時有媚嫉之者恐其成功多阻之而賊勢復熾乘間來攻柵公驅兵出與戰賊因風縱火衆大潰而公遂遇害時景泰元年五月十七日予聞之危身奉上曰忠功之光且盛者曰烈公所自立如此非誠所謂忠烈者歟蘭谿諸縣吏民相與頌公之德不置咸請立祠以奉公謹按陶公遇難時未設湯溪縣尚屬蘭地故祠記稱蘭谿

恩德祠 金華府志在儒學之右隆慶元年建祀明

知縣劉桐

傳詳
名宦

忠義節孝祠

忠義祠在縣城南門節孝祠在縣城

西門

國朝雍正五年知縣任之俊奉文建

浙江通志卷二百二十三

欽定四庫全書

浙江通志卷二百二十四

祠祀

八

衢州府

西安縣

附郭

先農壇 在東門外五十九都回回墩

國朝雍正六年知縣王世甲奉文建立壇宇并置耜田

四畝九分

社稷壇 弘治衢州府志在城北拱辰門外去府治

一里

風雲雷雨山川壇 西安縣志在縣治南門外

郡厲壇 弘治衢州府志在城北拱辰門外一里西

安附郭隨府致祭

城隍廟 西安縣志在府治南坐龜峯之首宋紹興

年建歷乾道淳熙屢加修繕元泰定乙丑郡守和

斯新之

鄧文原衢州府城隍廟記郡有峰其形若龜頭首南向郡治踞其背直南為廟以祀

城隍宋紹定間寇至官軍破平之若有風馬雲車
犄角來助寇以奔潰水旱疾癘禱焉咸格至元丙
子城居燬於兵惟廟獨存泰定乙丑監郡和斯來
守是邦祇謁祠下周視棟宇撓敗弗治撤而新之
至正初總管張士俊重修明弘治庚戌太守張俊
復擴而新之崇禎壬申署府楊助修葺

國朝康熙九年知府雷經重修二十八年知府董弘毅
三十七年知府張濬復修

西安縣城隍廟 西安縣志在縣南五十步醋坊巷
縣舊有城隍廟及建府即就舊廟立祀明隆慶五

年邑令梁問孟以縣不立廟終屬缺典捐俸修造
國朝康熙三十七年知縣陳鵬年重修

回龍塘靈澤廟 弘治衢州府志在城南嘉慶鄉

孔氏家廟

詳見學校

靈惠廟 明一統志在府城北項山下祀西楚霸王

項羽嘉靖浙江通志世傳項梁舉兵時羽為裨將

狗下縣衢因為羽建祠

夏希賢靈惠廟禱雨記大末郡城北其鄉曰玉泉有

項山焉蓋因楚項王之祠而得名也王起吳中會稽與大末相距不五百里宜為人之所眷故尸祝

而廟享之因以名其山李唐賀蘭公為守禱輒雨
志於石則王之靈顯舊矣丁未夏五魁煽虐焰彌
數旬弗戢土若圻龜稼且縮蝟推官張正文乃單
騎潛造項山祠禱焉少焉如聞暗鳴叱咤膚寸合
而甘霖沛民賴以甦神之靈惠
不彰彰歟千秋廟食誰曰不宜

關帝廟 西安縣志在縣治西萬曆辛丑九月郡守

張堯文建

信安侯廟 弘治衢州府志在城東晉將陳弘討趙
峻有功封信安侯祠於此

趙清獻公祠 舊浙江通志在郡城拱辰門外二里

即公故居宋咸淳間郡守陳蒙請於朝立祠明太守廖公改至浮石門內

國朝康熙十三年間總督李之芳督師駐衢求其後得九歲裔孫述祖屬教諭沈完龍撫之捐俸為資生擇配給衣頂為祠生奉其祀三十一年巡撫張鵬翻檄西安令鹿祐葺祠新像焉

張公祠 西安縣志在城南二十里石室堰溪北一名張少卿祠少卿宋西安邑丞也諱應麟號瑞伯

周台募修張公祠引公以少尹官西邑在宋南渡時西安之水利惟堰為急而堰之灌田最廣宜築宜修又以在石室地方者為急公任其責適當蛟龍窟宅溪水奔騰之際旋築旋圯迄三歲而功未成公晝夜立河壩望洋愁歎鬚髮皆焦而荷鋤之衆以需水來告者益急乃偏袒撫膺奮身鞭馬躍入巨浪中是時山水暴漲勢方洶湧吏民徒手不能援惟有繞岸驚呼相率羅拜而已頃之尸浮水出衣冠不壞面貌如生蓋自公歿後而英靈不泯當風雨慘淡時常見其身騎白馬在雲際則陽侯之威輒歛而堰務賴以告成事既聞膺贈典矣又為立祠於其地春秋祀之今石室溪之北所稱張公祠者是也惟是棟宇傾欹風雨不蔽邑侯李侯甫下車亟捐俸十金議所以新之而又為之序以示里民之能好義者

周宣靈王祠 弘治衢州府志在府治西北朝京門

內西安縣志神杭州新城人姓周名雄字仲偉母
病劇奉母命禱於婺之五王廟比歸及衢聞母訃
哀痛哭泣死舟中直立不仆衢人異之即奉神肉
軀斂布加漆建廟祀焉有大旱為霖反風滅火之
應元至元中巴延呼圖克守衢屢感神麻奏聞封王
號大新其廟明弘治丙辰廟燬復建嘉靖辛酉郡
守楊準新之作店房三楹歲收賃資以供香火

開平忠武王廟 嘉靖浙江通志在郡治北王常姓

遇春名有功於衢立廟以祀

胡昱忠武王廟記王濠州懷遠人年二十

有三當元至正乙未六月太祖龍飛和州王領衆來從請為前部先鋒挺戈拔采石乘勝取太平尋守溧陽勦圍集慶克徽誅池惛服毘陵擢都督大元帥陞鎮國上將軍己亥秋直擣衢州降之擊勦偽漢陳友諒擒執偽吳張士誠遷中書平章軍國重事封鄂國進爵上公經畧中原下山東攻河南平定晉冀開陝遼海朔漠己酉邁疾薨追封開平王謚忠武仍命衢州府立廟城中每歲三祭以饗之洪武距今百二十餘載棟梁蝨蝕榑簷腐爛廟遂傾圮川蜀廖鉉由進士來令西安白於郡守張公俊捐俸作倡復恢舊址以增益之經始於弘治辛亥仲秋落成於壬子季夏

清節祠 西安縣志祀明郡守黃真郡丞余伯深在

縣治北

鄭辰清節祠碑記 邦伯黃公湖廣黃岡人少伯余公湖廣常寧人洪武初先後仕於

衢及卒百姓咸罷市會哭於殯者動百千人適僉憲吳公按衢郡請構祠以祀而旋以遷去今少伯

吳侯即其弟也允父老請建祠並祀之顏其門曰開衢名宦清節祠

劉都憲羽泉祠 西安縣志公諱畿明嘉靖間撫浙

平礦賊士民感其功為立祠在浮石門內郡守廖

希元改城南清獻祠舊址

趙鏗侍郎劉羽泉祠記嘉靖己亥西安礦坑枯

蒼無賴輩出沒其間過年勾引日衆黨類日蕃先欲圖衢次及五邑守巡告急於公公自抗提兵抵

衢指授諸將方畧大破之盡焚其巢封其山振旅而還衢之父老言曰公兵三日不至則無衢無衢則無五邑矣立祠以永其報祠在衢州拱辰門顯忠坊前後凡三重每重凡五楹肖公之像於中堂而朝夕洒掃焚香拜祝者無間於老少云

知事祝芹父子忠孝祠 舊浙江通志芹督兵殺礦

賊父子死難春秋委官奉祭

西安縣志祠附於周王廟

林公德惠祠 西安縣志祀明衢州守林有年在郡

治北染織局

方豪德惠祠記吾衢有織染局歲輸緞一千三百八疋遇閏增一百九疋

力出於局料出於民五邑之民各以其價輸之於鄉佐名曰荒絲鄉佐各輸之於邵郡以貯之庫而

後給之句出入於吏胥之手重其入而輕其出且
不以其時甚者指為常例堂食而莫敢誰何也莆
中林侯寒谷以嘉靖初守是邦首庶斯弊痛革弗
遺每遇鄉佐輸價則命局工並進一立階左一立
階右交手相付而吏胥罔及聞焉尚復有所謂常
例堂食者乎於是十餘年之逋課完於三載百餘
年之宿弊去於一旦一局之人乃相與作生祠於
局中刻木為像朝夕奉香火歲時具牲醴共呼之
曰德
惠祠

李公遺愛祠 舊浙江通志公諱遂號克齋明嘉靖
間任衢守祠在郡治北即公講舍之右舊肖像於
講舍之教思堂後以公遺愛在衢特建祠以祀

張公遺愛祠 西安縣志公諱江明嘉靖間令西安
政尚德化生祠於羅漢寺寺廢遷邑西顯報寺郡
守楊準復新之

楊公仰德祠 舊浙江通志一在西安縣學明倫堂
之西一在郡治西茭池之左阮鶚楊公仰德祠記
公名準字汝度別號安吾

孝烈祠 西安縣志在城外西北隅鐵塔下

國朝諸生鄭榮組妻徐氏殉夫舅寃死邑令陳鵬年建

忠義節孝祠 忠義祠在縣學東節孝祠坊在府城

隍廟東

國朝雍正四年知縣王世甲奉文建

龍游縣

先農壇 在東華山

國朝雍正六年知縣徐景運奉文建立壇宇并置耜田

四畝九分

社稷壇 萬曆龍游縣志在縣西北四百五十步

風雲雷雨山川壇 萬厯龍游縣志在縣南五里

邑厲壇 弘治衢州府志在縣北一里

城隍廟 龍游縣志在縣北百步明洪武二年建正

統中知縣張惠天順中知縣王瓚嘉靖中知縣陳

鈇相繼重修

國朝康熙四年重修十七年燬十八年知縣盧燦重建

龍鬚巖龍王祠 弘治衢州府志在縣南四十里相

近有青葛澳龍王祠

徐偃王祠 明一統志在龍游縣西四十里徐山下

龍游縣志即仁惠廟唐元和九年刺史徐放重修

韓愈徐偃王廟碑徐與秦俱出柏翳為嬴姓國於夏商周咸有大功秦處西偏專用武勝遭世哀無明天子遂虎吞諸國為雄諸國既入秦為臣屬秦無所取利上下蒙賊害卒償其國而沉其宗徐處得地中又文德為治及偃王誕當國益除去刑爭末事凡所以君國子民待四方一出於仁義當此之時周天子穆王無道意不在天下好道士說得八龍騎之西遊同王每宴於瑤池之上歌謳忘歸四方諸侯之爭辨者無所質正咸賓祭於徐執王帛死生之物於徐之庭者三十六國得朱弓赤矢之瑞穆王聞之恐遂稱受命命造父御長驅而歸與楚連謀伐徐徐不忍鬪其民北之彭城武原山

下百姓隨而從之萬有餘家偃王死民號其山曰徐山鑿石為室以祠偃王偃王雖走死夫國民戴其嗣君如初駒王章禹祖孫相望自秦至今名公鉅人繼迹史書徐氏十望其九皆本於偃王而秦後迄今無聞家天於柏翳之後非偏厚薄施仁與暴之報自然異耳衢州故會稽太末也民多姓徐氏支縣龍邱有偃王遺廟或曰偃王之逃戰不之彭城而之越城之隅棄玉几研於會稽之水或曰徐子章禹既執於吳徐之公族子弟散之徐揚二州間即其居立先王廟云開元初徐姓二人相屬為刺史帥其部之同姓改作廟屋裁事於碑後九十年當元和九年有徐氏放復為刺史放字達夫前碑所謂今戶部侍郎其大父也春行視農至龍邱有事於廟思惟本源曰故制拘撲下窄不足以揭虔妥靈而又梁桐赤白彫剝不治圖像之威黜昧就滅蕩拔級夷庭木禿缺祈咄日慢祥慶弗下

州之支郡不獲蔭休余惟遺紹而尸其土不即不
圖以有背聚罰其可辭迺命因故為新衆工齊事
惟月若日工告訖功大祠於廟宗御咸序應是歲
州無怪風劇雨民不夭厲穀果完實民皆曰耿耿
社哉其不可誣乃相與請辭京師歸而鏡之石辭
曰秦傑以顛徐系邈綿秦鬼久饑徐有廟存婉婉
偃王惟道之耽以國易仁為笑於頑自初擅命其
實幾姓歷短言長有不備亡課其利害孰與王當
姑蔑之墟太末之里誰思王思立廟以祀王之聞
孫世世多有惟臨茲邦廟土實守堅嶠之後達夫
廓之王沒萬年如始祔時王孫多孝世奉王廟達
夫之來先慎詔教盡惠廟民不主於神惟是達夫
如孝之元太末之里姑蔑之城廟祀時修仁孝振
聲宜寵其人以及後生嗟嗟惟王雖古誰亢王死
於仁彼以暴喪文
宋紹興乾道淳熙間屢燬屢建
追作誄刻示茫茫

紹定中郡守袁甫重建

袁甫徐偃王祠記衢邦靈山廟血食歲久靈迹愈著

寶慶二年冬甫假守於茲邦人僉言王大有功德於民封爵宜極褒崇王妃王子亦當隆品秩以侈報稱乃具以實聞於朝事且施行矣是歲十二月旁地居民曲突弗謹延及王祠倏焉灰燼守以祀神治民為職廟燬神怒民失憑依甫甚震懼於是協衆志捐郡帑乃廣規制乃拓基址四方之民間廟再新炷香乞靈者肩摩於道乃請封爵儀曹上之朝省天子嘉王功德改封靈惠慈仁聖濟英烈王妻姜氏協濟夫人子寶宗祐順侯寶衡祐德侯寶明祐澤侯

元至正間燬明重

建嘉靖中燬隆慶六年知縣涂杰重建

劉章偃王廟詩粉榆

青蔭密不記幾周星造化畱神迹山川安地靈一時捐玉几千古享彤庭仁義終難泯丹心照汗青

汪藻謁偃王廟詩石馬金輿識故宮斷碑磨滅覆
杉松誰憐邠國干戈地空有塗山玉帛踪芳草滿
庭留晚色斷雲連野斂春容中原逐鹿歸狙詐此
意悠悠委暮鐘謝翱憶遊錦溪徐偃王祠下詩徐
王遺踐地花落舊巖阿山鬼下茅屋野禽啼苧蘿
別祠溪路見疑塚草間多寒食思家客空山記此
過

龍丘祠 萬歷龍游縣志在縣東三里祀漢龍丘萇

萬歷元年知縣涂杰創建

童珮龍丘祠堂記少嘗
數登龍丘山過先生居

處其棲息或在巖壑間蓋與人殊矣父老又指其
下即先生塚乃不封不樹云歲隆慶辛未南昌涂
侯以進士來治龍喟然曰今夫一中之家事其
祖先必有供伏臘之處矧邑以先生名是先生且

為一邑祖乃歲有一區用陳俎豆以妥其靈政之
缺失莫是為大乃為卜地東華山之陽下令鑿石
畚土掄材度工丹墨漆堊靡不善良閱數月而告
成王之弼龍丘先生祠詩躡屨登靈境東華迴自
孤庭松翻翠蓋野日遍金鋪一縷垂千古斯文寄
匹夫先生默無語片葉下秋梧余恂龍丘先生祠
詩君不見龍丘先生生東京高隱避世稱獨醒賢
人在邑邑為重城郭遂以龍丘名古人姓氏垂不
朽往往山川同其久我亦先生之邑人出處慙惶
空俛首先生有屋九峯巔先生有友鈞臺邊龍丘
之山嚴子瀨客星萬古名雙懸先生已往祠山麓
俎豆春秋歲相續一自滄桑峰燧多棟宇為摧庭
草綠即今懷古弔遺蹤仰止高山悵莫
從欲識先生何處是亭亭祠畔一蒼松

扶風太守祠 弘治衢州府志在縣東十五里馬報

山上龍游縣志即遺愛廟祀晉徐弘

東陽實錄弘字聖通太末

人習韓詩春秋舉孝廉遷守扶風討里賊戰歿鄉人感其誠節為立祠東陽刺史徐嶠之禱雨每應

政和間

賜額

楊侯祠 萬歷龍游縣志在縣西北二十里盈川境

上祀唐盈川令楊炯

余忠肅公祠 萬歷龍游縣志在縣治西二百步祀

宋左丞相余端禮

涂公祠 龍游縣志在儒學後祀明縣令涂杰

曹開禮謁

涂公祠詩當年枳棘有鸞鳳露冕今看嗣遠芳祠
以地靈昭景貺人因香爇卜農祥千峰翠合雲為
幔九曲青回芷可觴百世清
風聞石瀨仁風流詠轉高長

貞烈祠 龍游縣志在治北三里明嘉靖中知縣萬

松建祀烈女徐蓮姑詔以貞烈旌其門

傳詳列女

忠義節孝祠 忠義祠在學宮內西偏節孝祠在學

宮外東偏

國朝雍正四年知縣徐景運奉文建

常山縣

先農壇 在城東隅張字號田土名菴坂

國朝雍正四年知縣張檜齡奉文建立壇宇并置藉田

四畝九分

社稷壇 弘治衢州府志在縣西一里來遠門外

風雲雷雨山川壇 弘治衢州府志在縣南一里

邑厲壇 常山縣志在北城門外左側

城隍廟 弘治衢州府志在縣治南乾道改元令胡

競建常山縣志洪武三年徙北城外景泰間知縣

杜英修之萬曆元年知縣郝孔昭徙至屏山東麓
靈濟廟 弘治衢州府志在縣東溪北其神曰康將
軍宋世歷有封號

昭應廟 弘治衢州府志在縣東三十里雙塔山舊
名白馬三郎廟宋紹興丁巳禱早有感龍圖學士
梁默請於朝曰王審知在唐破閩寇常騎白馬軍
中號以白馬三郎此地與閩接蓋審知廟無疑生
已享王爵今猶用軍中之號乞賜今額

四賢祠 舊浙江通志明嘉靖辛丑提學副使張岳
改白龍洞菴為之祀宋丞相趙鼎學士范冲侍郎

魏矸縣尉翁蒙之

詹萊重修四賢祠記惟宋宰相忠簡趙公翰林侍讀學士范公

集英殿修撰魏公皆以流寓葬於邑里其功德實在天壤宜隆特祀既改白龍菴以祀三公而司農寺丞前常山縣尉翁公常郡將章傑移檄搜索趙氏書簡薰傾其宗以媚秦檜公以身膺禍譴而併蔽之亦連類而祀焉顧不及三十年幾類且廢隆慶辛未邑侯南滁鹿野郝公將事祠下盡撤其舊而作新之名之曰白龍洞四賢祠文徵明四賢祠跋按忠簡解州人范蜀人魏和州歷陽人國史皆有傳然皆不著其所以居常之故愚意建炎南渡中原椒擾衣冠奔迸三公當時侍從扈駕而南占

籍於此未可知也。紹興抵今三百餘年，詹子乃能搜訪遺跡於荒煙野草之墟。賢有司為表彰於音塵消歇之後，豈不以忠賢過化山川耀靈居其地者固將假之以為重耶？詹在泮四賢祠詩：四賢祠宇夕陽殘，門掩空庭古洞寒。一鳥不鳴山寂寂，連峯深樹露溥溥。殷殷邦完節，三仁遠晉室。存孤二客難，借問祠前名利客。往來可為解征鞍。

容保祠 常山縣志在縣治東百餘步。明嘉靖四十

五年巡按御史龐尚鵬奏請行免役法，百姓便之。

建祠立碑

詹茶為記

龐公祠 舊浙江通志在西門外祀明郡守龐承寵

忠義節孝祠 忠義祠在學宮內節孝祠在縣治左
國朝雍正五年知縣張檜齡奉文建

江山縣

先農壇 在過溪王家地方

國朝雍正五年知縣汪準奉文建立壇宇并置藉田四
畝九分

社稷壇 正德江山縣志在縣北五里

風雲雷雨山川壇 正德江山縣志在縣南三里

邑厲壇 江山縣志在青霄橋右

城隍廟 江山縣志在縣西五十步宋紹興間知縣

魯_澗重建咸淳間趙時韶重修元天曆三年縣尹

程郇重建明嘉靖間知縣侯祖德重建萬曆十年

知縣易倣之造省心亭於正殿後十九年知縣張

斗重建大門三十八年知縣程鵬舉鼎新後漸圯

僅存廟門以棲神像

國朝康熙二十年知縣劉漢裔飾棟宇迎神像居之康

熙三十八年知縣朱彩建大殿及兩廊

馬刺史廟 弘治衢州府志在縣南三十五里裏坂

神名咸嘗任滑州刺史

靈石廟 弘治衢州府志在江郎山陰大觀四年賜

廟額靈石

方輿勝覽江郎廟在江山南五十里文思博要云有江姓三昆弟登其巔化為

三峯因名焉湛滿者居山其子仕路遭永嘉之亂不得歸滿使祝宗言於三石之靈能致其子靡愛斯牲旬日中湛子出游水邊見三少年使閉眼入車中但聞去如疾風俄頃從空墮乃家中後園也

忠義祠 舊浙江通志祀唐忠臣張巡明侍御王道

重修

方豪忠義祠記石汀公以監察御史按部至江山縣聞有張中丞廟而謁焉伏起之餘駭

塑貌甚異以詢江山徐令萬壁令對曰是俗所謂厲鬼象者矣公嘆曰厲鬼之云張公一時之憤耳而乃附會至此不易之何以醒俗况廟宇漸傾崇奉未愜乃以語衢守林君以永旬月之間變俚為雅更故作新廟貌俱隆井邑改瞻林君大書忠義祠伐石為碑特書其事

大義祠 嘉靖浙江通志舊在縣後祀正節先生徐

應鑣

傳詳忠臣

正德十四年提學副使盛端明徙通衢

門內

舒芬大義祠記方元巴延入臨安盡仔三宮百官諸生以北惟公呼其二男一女訣奠於

岳武穆王祠前不與俱以火不克死復以水乃死舊有祠在縣治左正德己卯改建於通衢門內之

東祠舊因公謚今額曰大義庶足以表公之心也
夫李攀龍謁徐正節祠詩挑菊何勞問楚巫稜稜
霜氣寄青蒲時危烈士乘箕尾事去孤臣泣鼎湖
八口全忠青史永千秋正氣紫霞扶不知故國西
陵月猶照亭
臺俎豆無

宣城方先生祠 江山縣志先生諱召字虎隣明末

殉節祠在市中心街

忠義節孝祠 忠義祠在學宮內右偏節孝祠在學

宮外右偏

國朝雍正二年知縣汪準奉文建

開化縣

先農壇 在東城外金錢山下

國朝雍正五年知縣孫錦奉文建立壇宇并置藉田四畝九分

社稷壇 弘治衢州府志在縣西北一里

風雲雷雨山川壇 弘治衢州府志在縣南二里

邑厲壇 弘治開化縣志在縣北一里

城隍廟 開化縣志在縣治西北百步舊在縣東即

利澤廟因涉水不便明洪武三年知縣張高移縣
治南百步嘉靖十八年移今地

利澤廟 弘治衢州府志即舊城隍廟去縣溪東一
里相傳起五代時莫知何神也舊名水口廟宋紹
興二十七年邑令喻仲遠重修且請額淳熙初虎
入縣境令致禱虎即去十一年封昭惠侯

東嶽行祠 弘治衢州府志在縣北一里宋建炎戊
申建

武安王廟 弘治開化縣志在縣治東千步甲辰年

知縣李大芳建

魯貞武安王廟記和州李侯為開化之九月人復舊業百廢具舉於

是作武安王廟於縣之東隆棟凌空飛簷繚霧高堂爽塏二亭對峙西曰三義所以明神之與劉張友善也東曰一覽所以覽溪山之勝也廟之兩旁翼以廡二間廟之後種桑二百株開田五畝命鄰人收其歲入以為晨夕香燈之資神像既設儼然若臨

顯佑廟 弘治衢州府志在縣南五十里神為程巖

將大王元勅加惠武靈王

程斗顯佑廟記淳祐二年七月詔衢州開化縣

立程巖將之廟於龍山額曰顯祐從其邦人之請也按程氏譜曰巖將諱旭字明父嘗出畋而遇虎

欽定四庫全書

卷二百二十四

騎以歸呼家人謂曰予死當為神明葬於龍山歲
苦旱現夢父老曰吾為祈於帝得請矣厥明果雨
歲以大豐自是鄉有困厄必禱於墓疫癘飲水以
愈寇盜現旗以捕蝗飛而倏滅苗槁而復甦此其
靈應之
大畧也

忠義節孝祠 忠義祠在縣南學宮左偏節孝祠在

縣西卧佛山側

國朝雍正四年知縣孫錦奉文建

嚴州府

建德縣 附郭

先農壇 在東郊外碧溪塢距城五里

國朝雍正六年知縣薛景珏奉文建立壇宇并置耜田

四畝九分

社稷壇 萬厯嚴州府志在府城西武定門外一里

風雲雷雨山川壇 嚴陵志在府城南澄清門外隔

江距城二里

郡厲壇 萬厯嚴州府志在城北拱辰門外一里

舊浙

江通志附郭不
別置餘縣如制

城隍廟 新定續志在子城內西神以建安王為稱

莫知封號之始宋景定辛酉知州錢可則請於朝始賜額靈應建德縣志明成化八年知府朱暄立坊扁曰城隍廟萬曆五年知府楊守仁重修

國朝康熙十七年知府陳于廷大修復建後樓三間戟門外濬一巨池中架石梁榱棟輪奐堅固倍昔何士

錦嚴州府城隍廟碑記甲寅春寇起西南繼以閩叛郡伯陳公單車馳任視事畢例謁城隍廟既進父老而言曰斯神也郡倚為保障也箕風畢雨莫不由之而敗壁頽垣吾見神靈之不我妄侑矣今

日為爾民保境土為爾民全室家雖子刺史責而神實共之諸所理葺姑少俟焉於是獎帥士卒躬詣寇壘宣朝廷威德示以坦懷遂相繼就撫而各縣乃寧者定之暇遂修建城隍廟鳩工庀材子來趨事相與勒石傳之永久

建德縣城隍廟 建德縣志在縣治東向祔祀於府城隍廟崇禎丙子知縣吳洪昌建梯雲樓三層癸未年知縣楊宗簡改為縣城隍廟

順濟廟 嚴陵志在縣東東山之上舊名兩港龍王廟蓋以祠新安東陽二港之神也先是廟在水南

雨漲則二水爭行因溢入城為患宋元祐八年知州呂希純即二港匯流處立廟又為文以祭自是無復水患淳熙甲辰春權州事通判劉泌遷於今所己酉賜廟額曰順濟建德縣志一在城西建蒼山內附祀金元七總管之神

梓潼真君祠 嚴陵志在府城內桂華坊東葉夢鼎梓潼真君行祠記宋景定二年太府寺丞知嚴陵錢侯建

平水廟 嚴陵志在縣東北六十一里芝山東麓鄉人以奉大禹名曰通天平水廟水旱禱之輒應

英烈王廟 明一統志在府城東四十里胥村萬厯

嚴州府志伍子胥別廟也

名勝志宋設胥口驛今廢相傳伍子胥駐兵於

此今有子胥祠

嚴陵祠 建德縣志舊在城東報恩寺西南明嘉靖間知府吳世澤建萬厯二十三年知府陳經濟改建於建安山麓面迎流水清曠得宜

國朝康熙二年知縣胡應華修

關帝廟 舊浙江通志一在興仁門內明洪武年建

一在府學西

國朝康熙九年建

任公祠 建德縣志祀梁太守任昉舊在城南今改
和豐倉前祠曰任公志遺愛也

陳司徒廟 嚴陵志在縣西六十里銅官山據廟碑
神名果仁仕隋當義寧中羣雄交作司徒統兵晉

陵窺覲者畏伏旁衛江浙至唐乾符二年鎮海軍
叛卒王郢緣海為寇節度觀察處置使禱謁有應
置廟郭南門具以事聞追封忠烈公

汪大王廟 建德縣志在縣西三十里汪尖山下神
諱華當隋末保有宣歙之衆唐興納土是不忍鬪
其民者故至今祀之

廣濟廟 嚴陵志在拱辰門外神姓邵名仁祥字安
國淳安人隱居烏龍山且死語人曰立廟祀我當

福汝時唐貞觀三年也梁開平元年封貞應王宋

熙寧八年封仁安靈應王紹興十二年賜額廣濟

建德縣志元至正間修胡翰新修廣濟廟碑嚴陵之山其望為烏龍蟲起江

上其西南為郡城外至郡二里有祠翼然負山而

陰巨木則廣濟廟也郡守吏至者既視事則必告

謁有故則必為民祈請著為恒典行省右丞李公

思本謁拜祠下顧惟廟之木石丹漆黝堊歷歲滋

久摧朽剝泐乃飾廟像加粉采焉摧朽者易以

堅良剝泐者施之塗甃神安其靈人用禮享

弘治辛亥重修

湖山廟 舊浙江通志在縣西北十里聖湖之南唐

末黃巢餘黨逃此失其所在主帥夜夢張范二神告曰翌日雙白鶴所止處賊所在也至則果然遂勦之事間張封靈休安民侯范封靈祐定民侯

三先生祠 嘉靖浙江通志在武定門外初名思范

祠祀宋郡守范文正公仲淹後增祀東萊呂成公祖謙改名政教祠嘉靖三十八年提學副使范惟一以宋南軒張宣公栻亦曾守嚴因併祀於其中

故曰三先生祠

徐階為記

翊忠侯廟 嚴陵志在縣西一十五里地名靖林

楊幼

度勅封翊忠侯廟記靖林有神潘侯世雄名一飛
 字也生於宋治平改元五月二日至宣和三年二
 月既望麗景冲和迺沐浴更衣謂青衣之使已至
 天帝召為陰府官主陽間事言已即逝侯之神自
 此彰矣葬於蕙巖靈威不可犯祠於寓里靈驗動
 可祈今百有二十餘年一境之內亢陽烈晝隨禱
 而濡積雨靈雲隨祝而霽疫癘屏息寇盜蠲除家
 無鬱攸里無巨浸揆厥本原非神禱賜流芳歟寔
 久神惠益昭嘉熙紀元郡守
 趙汝柄奏於朝勅賜翊忠侯

周宣靈王廟 萬歷嚴州府志在三元坊嘉靖間建

錢廣居周宣靈王廟碑按神周姓繆宣名臨安新
 城縣太平里人也生宋淳熙戊申歲三月四日初

名雄以雄音鄰榮恐干父諱改名繆宣神少時受
仙指大數四九後之武源至鷓鴣灘失足墮水頃
刻巨浪層翻猛若蛟龍起伏神即脫化湖波而上
至衢城水亭門外浮沉不定聲聞數十里一時驚
異建廟塑像崇祀於衢城之西是年神正三十有
六果應四九之說乃嘉定癸未歲也端平元年大
封神得贈廣平侯淳祐元年秋勅封神護國廣平
正烈周宣靈王延祐三年睦郡旱潦藉神庇陰得
錫平康士民遂立廟於澄清門內自元歷
今卅年三百有奇禦災卹難不可枚舉

二太守祠 建德縣志在北高峯祀明守楊守仁鄭

銳 傳詳
名宦

忠義節孝祠 忠義祠在字民莊學宮內節孝祠在

純孝莊

國朝雍正四年知縣薛景珏奉文建

淳安縣

先農壇 在東郊

國朝雍正五年知縣姚永光奉文建立壇宇并置耜田

四畝九分

社稷壇 淳安縣志在縣之西郭一里

羅願社稷山川壇鼎修記

士有生於五帝之世而見祀於今禮有隆於三代之時而下廢於後此不惟其人可尊其義之所該

者至深遠矣自古既邈五帝之臣其傳者無幾而高陽氏之土正有虞氏之稷世獨相與社而稷之見於展禽史墨之說其禮壇而不屋腥而不孰有俎豆而無杯器又皆商周之舊典上下數千年間不敢有所變蓋土穀者民情之所重而社與稷實司焉自丘民以上隨其所在封而事之天子以建諸侯而諸侯以有其國君民之情如此其同也以其生有平土殖穀之能其神不泯屬之以雨暘寒燠之事無不得其所欲天人之際又如此其不異也因其沐浴齋宿登降薦徹者有為入下之道則從而訓民以為事君之法因夫水早有變置之說而諸侯不職者不得免則等而施之以為馭臣之法一歲之間春以出火秋以卜稼冬以息耋有屬民讀法之事有用幣救變之事其或不得已而用民於兵小則受肉而行師大則釁牲而出境有功獻於是有罪戮於是如家人父子出告反面而

從事於庭內非以是為希濶之典而行之也重民之居而敬其食故其俗重厚而不遷明命有功者而祀之故其民端慤而不鬼因物之常而寓其教訓故令行禁止而風俗成民日見上之親己而所施又無悖乎四時之序是以其上易為而其神易福也嗚呼古之求於社與稷者其詳如此非固欲神之福而已蓋知至意誠無精粗表裏之異則散於事者可以知其政而觀其禮此所以為不貳也後世與民相接者至簡矣惟其治財聽訟施於官府者然後以為政非般於社而降之若是者神固無與也里中之社喧囂而醉飽惟其習威嚴事存於有司者然後以為禮雞鳴而行事未明而瘞若是者民亦不知也且夫耳目之不接而欲變化其心術已不可得况所謂出火之早晚與來歲五種之宜否所息之物所救之變則其說既古矣兵農已分而師祭者遷矣是後世之求於社者甚畧也

然據其存於今者而尚論其故則其人蓋五帝之佐而其禮乃三代之舊生人之類所以得相收至於今者賴其力為多而前世遺禮之僅存者此而已故猶相與守之而學者尤樂道之云耳長樂陳君曄來為淳安縣方是時議者以州縣社稷壇壝多不葺詔長吏修築守護月檢察之君於是即縣西二里故所謂社稷壇於南山之麓表山川風雨雷師之壇俱伐石治之且為屋者三以待事築牆七百丈而外闕之淳熙七年七月上戊既成而祭丞議郎知南劍軍州事羅願記

風雲雷雨山川壇 嚴陵志在縣南一里上善觀前

邑厲壇 淳安縣志在縣西北半里

城隍廟 嚴陵志在縣東南真應廟後明正統十三

年縣丞沈宗賢重建弘治元年知縣劉麓重修

吳泰伯祠 明一統志在淳安縣東三十里太平鄉

吳貫泰伯祠記 嵩山下舊有泰伯祠為宋咸淳中進士吳攀龍所建扁曰至德明宣德正統間吳晉吳士才重整新之肖以像歲時奠祭嗣後僉事吳欽以子姓蕃衍祠隘不能容乃稍廓其規模輪奐一新益以延陵季子札配享於旁

真應廟 嚴陵志在縣學東南神姓方名儲相傳後

漢時以賢良方正仕和帝後為洛陽令卒贈黟縣

侯立廟宋政和七年賜今額

方瑞合重修東山黟侯廟記 吾族之散處

者輒祀黜侯其神明之道著也自吾祖塿公遷茶坡祀侯東北山下幾二百年山下水通溪有軒駐橋是侯乘鶴歸來處故山下橋亦名軒駐橋橋邊水匯可二畝蒹葭蒲葦丘壑冷然由橋陟廟一望平田廣阪菁蔥萬樹隔岸雲巒稠疊如繡真偉觀也但廟製草具久益傾圯歲時拜祭少登望之樂又旁無餘室可以庇緇素考鐘伐鼓有時缺焉時兵革少息秋禾用登余與族人謀而新之

山陰侯廟 嘉靖浙江通志一名賀將軍廟祀漢新

都郡太守封山陰侯賀齊歲以仲春仲秋望日祭

名勝志賢溪記云歛之東鄉古葉鄉也東漢書建安十三年遣武威中郎將賀齊討定丹陽黜歛時武疆葉鄉東陽豐樂四鄉先降因表葉鄉為始新縣今縣西北六十里永平鎮有土主廟名賀將軍

祠又呼為葉公蓋尊之也公字公苗會稽山陰人
祠之西配食漢南部行事南郡守關內侯方公濟
東配食本州別駕龔黜侯方公觀之姚鳴鸞重修
東廟記邑市分東西古有二廟以祀神廟之在東
者問其神之所自則曰勅封靈順侯葉府君廟之
在西者問其神之所自則曰勅封山陰侯賀公夫
神一也封爵一也而有賀與葉之分者按漢三國
時會稽山陰侯郡守賀公諱齊擊定山越以討賊
立功封威武中郎將加偏將軍是封爵之源始於
此去縣治數十里地名葉鄉有賀將軍祠迺賀公
立功之地又謂葉鄉上地故以賀為葉是姓氏之
訛始於此歲甲申市東之人重修廟宇凡諸木石
工費皆出於居民之樂捨廟貌重新神像儼然是
固賀公功德之所致亦我後人崇報之宜然功成
用書以
為記

孚惠廟 萬厯嚴州府志在縣東六十里一名何侍郎廟舊在安樂鄉成化志稱神名文建仕陳官至吏部侍郎為劉球所譖而死歸葬萬程里數顯靈異鄉人祠之宋淳熙十三年賜額孚惠紹定五年封昭利侯咸淳元年加靈順侯

忠助廟 嚴陵志在縣西一名忠濟侯祠神姓汪名廣即歙郡英濟王子也仕唐為飛騎尉歿封忠濟侯宋紹興壬子暴水衆禱於神水即退賜廟額曰

忠助

靈惠廟 巖陵志在縣東七十里神姓王名克儉事
唐為都押衙子孫立廟祀之祈禱有應累封忠順
英烈侯宋紹興中賜今額

陳府君祠 淳安縣志在縣東三十里屏風巖相傳
神青州人唐龍德中為青溪令黃巢之亂與其二
子率邑人避於巖巢兵圍之七日乃引弓發石擊
之巢兵大潰邑人德之因祀於巖

戈府君廟 新定續志在縣西五里舊傳神事吳越
提兵禦敵不利敵斷其頭并棄之神右手持劍左
手自提其頭行至今祠所仆焉既而風雨晦冥雷
電震耀鄉人駭其神異即地為廟祀之

靜樂先生祠 嘉靖浙江通志在縣東北二十五里

祀唐方昊

方逢辰靜樂先生祠堂記淳安縣常樂鄉上貴寺祠堂者唐處士靜樂先生方

公聚徒授業之所也先生生於唐末以節義自高五代吳越錢氏招之不往遊於深山讀書講道以終老焉昔宋咸淳明堂詔書求歷代忠臣烈士有功於民者令州縣歲時致祠知縣事承議郎盧應

偶發錢一千緡下本寺助造佛廬就中為先生祠從衆請也

英烈錢王廟 嚴陵志在縣西七十里神姓錢歙人

長名密季名譽有別業在永平宋宣靖間團民兵衛鄉井有方畧建炎己酉金人犯臨安沂浙江而西二侯與邑人方庚率民兵三千人至桐廬縣西視牛頭山迫險可得志布置迎敵大敗其衆金人北遯後以功各補承信郎紹定庚寅江東部使者列其功請立祠於嚴賜號英烈紹定癸巳歙民復

請賜爵乃封學為惠顯侯爵為惠濟侯

朱文公祠 嚴陵志在縣學文廟戟門外元延祐六

年縣尉鄭千齡建

王儀新建朱文公祠堂記淳安古歛之東鄉今雖屬旁郡然距

新安不二百里朱子之沒僅百餘年所謂去聖人之世若此其未遠近聖人之居若此其甚者故凡孔子廟學宜皆有祠以奉朱子而况淳安之望紫陽為甚近學者進拜先生於祠下則知幸生有道之世宜交相慶而更相勵也

融堂先生祠 嘉靖浙江通志在學西祀宋儒錢時

寶祐間建

蛟峯先生祠 嘉靖浙江通志在石峽書院祀宋方

逢辰元至大間建

海公祠 淳安縣志在邑西察院左明邑民錢德貞

余元恭助地構祠以祀前令海瑞後令吳天洪復

改築南山麓嚴州府志萬曆五年建

徐廷綬為記
徐楚海公祠

詩垣屋蕭蕭錦水涯舟人指點海公祠風波自不
驚三黜暮夜誰能枉四知虎口脫離瀕死日龍顏

回顧再生時百年借寇天
閣遠惟有棠陰繫去思

忠義節孝祠 忠義祠在文公祠後節孝祠在文公

祠東

國朝雍正四年知縣姚永光奉文建

桐廬縣

先農壇 在縣治東北地名塔山脚

國朝雍正五年知縣張坦熊奉文建立壇宇并置耜田
四畝九分

社稷壇 桐廬縣志在縣治西一里許舊在圓山之
西宋縣令劉公臣嘗建豐亭於其上後人以登陟

頗艱遷於縣西八十步地名朴樹元豐末復移置
圓通寺之東即今處也

風雲雷雨山川壇 桐廬縣志在大江南岸去縣治
三里明萬曆二年知縣李紹賢因南渡風雨不便
遷改社稷壇西

邑厲壇 萬曆嚴州府志在縣東四百七十步

城隍廟 桐廬縣志在縣治北一百五十步據安樂
山之第二峰縣以安樂山為主山而此山又其龍

脉所聚故建廟於此宋景定癸亥縣令胡太古嘗
修葺殿宇歲久殿毀元大德七年邑人鄭源等重
建明洪武初知縣毛道即舊殿而增飭之景泰間
縣丞許善重修正德七年知縣曹珪益加修整嘉
靖十三年縣丞章彥重蓋廟宇隆慶五年通判陳
彛建東西二廊立各鄉土地之神萬曆八年知縣
楊東捐俸修葺

桐君祠 嚴陵志在縣東二里桐君山頂

萬曆嚴州府志宋元

豐中縣令許由儀嘗訪桐君藥錄已失傳惟山隈
有雙小桐廼繪桐君像於絕頂小堂有詩云山中
百藥當年錄砌下雙桐舊日孫後孫景初代為令
易繪像以塑名人多雷題元末兵燹廟貌無存洪
武中重建小祠成化間顏地嘉靖初知縣張瑩闢
舊址構祠三楹設桐君木主祠後豎樓柱以石壘
以木執甚崇聳取長樂寺鏞懸之歲設鐘夫以司
晨昏亭塔巍我山水掩映每登眺江山景物一覽
在目彷彿圖畫中昔人比之浮玉山又號小金山
可以見其勝也徐舫張小山重修桐君祠詩先生
遠有煙霞趣錫玉捐金隱者祠瑶草久荒雲一片
碧梧仍見鳳雙枝芙蓉日靜文書暇杖履春來嘯
咏遲他日幽期何處
好寒松花發鶴歸時

嚴先生祠 方輿勝覽在釣臺先生名光字子陵本

姓莊避明帝諱改嚴嚴陵志在縣西三十五里富

春山之下宋景祐中建

范仲淹嚴先生祠堂記先生光武之故人也相尚以

道及帝握赤符乘六龍得聖人之時臣妾億兆天下孰加焉惟先生以節高之既而動星象歸江湖得聖人之清泥塗軒冕天下孰加焉惟光武以禮下之在蠱之上九衆方有為而獨不事王侯高尚其志先生以之在屯之初九陽德方亨而能以貴下賤大得民也光武以之蓋先生之心出乎日月之上光武之量包乎天地之外微先生不能成光武之大微光武豈能遂先生之高哉而使貪夫廉懦夫立是大有功於名教也仲淹來守是邦始構堂而奠焉乃復為其後者四家以奉祠事又從而歌曰雲山蒼蒼江水泱泱先生之風山高水長劉基嚴先生祠詩伯夷清節太公功出處行藏豈必

同不是雲臺興帝業桐江無用一絲風羅洪先巖
先生祠詩漢廷懷舊德獨愛水雲深白髮一竿暮
青山七里春江湖開歲月夜景浴
星辰千載荒祠下停舟有幾人

高府君廟 嚴陵志在縣南三里神名獲漢時人素

善天文與嚴子陵有舊嘗自石城適富春訪其廬
時值大旱即曳劍登潭巖叱曰此湫有蛟龍當起
行雨未幾雷雨交作秋遂大熟邑人感其惠立廟
祀之

陳侯廟 嚴陵志在縣東南十五里相傳富陽侯陳

碩子也有仙術能役使鬼神嘗於餘杭一夜築九里塘不假人力而成既死依此土為神

董司徒廟

桐廬縣志在縣西二十八里

朱軹董司徒廟記司

徒諱舉字正忠里人也黃山之傍夏孝先父墓在焉一夕野燒熾焰延屬墓木其嗣哀號無所措忽百鳥飛集濡其羽沃之火即滅墓側湧一泉流於江因名其鄉曰孝泉里曰仁孝至司徒時忽涸公諭里中曰泉脉無古今何流於昔而今絕焉必吾鄉事親之道有愧昔人所致乃率眾齋沐禱曰若一鄉有譴願以身塞日夜不怠遂殞於側泉湧如初至今不竭周十餘里無復旱暵之苦眾德之深思致其報獲吉卜於大鍾山之西歸其柩藏焉擇其東建祠今壘石之所土益堅厚號董公圻晉開

運中浙右大旱遣使謁祠下未反命油然沛然槁者立蘇禾倍長祠之左漚為大澤遂號新澤錫王稱曰標福嘉其貺也

潘尚書廟 嚴陵志在縣西南十五里相傳神為王村浦人名宗衡宋南渡從高宗破寇有功授鈴轄沒著靈驗邑人立廟祀之勅贈尚書

胡侍郎廟 嚴陵志在縣西南二十里地名清渚神即宋禮部侍郎胡寅也紹興中嘗為郡守有德於民故祀之

二先生祠 桐廬縣志在桐君山明萬曆五年知縣

李紹賢建以祀文敏莊襄二公

謹按吏部尚書姚夔謚文敏都察院右都御史俞諫謚莊襄皆邑人傳詳名臣

李侯祠 桐廬縣志在桐君山巔明萬曆七年士民
為李侯紹賢建

忠義節孝祠 忠義祠在儒學左側節孝祠在縣治
西

國朝雍正四年知縣張坦熊奉文建

遂安縣

先農壇 在東郊

國朝雍正五年知縣曹維藩奉文建立壇宇并置耜田
四畝九分

社稷壇 遂安縣志舊在縣南明洪武初建萬曆三
年知縣吳撫謙改置城西二百步

風雲雷雨山川壇 遂安縣志舊在縣南明洪武初
建萬曆三年知縣吳撫謙改置城東四百步

邑厲壇 萬歷遂安縣志在縣西半里

城隍廟 萬歷嚴州府志在縣南洪武四年知縣凌

暹建成化十一年知縣朱福嘉靖二十四年知縣

羅袞修隆慶四年知縣周恪甃砌石臺

國朝康熙年間士民倡修規制一新

東嶽廟 嚴陵志在縣治西宋祥符間建元大德至

元中嘗加修葺

王通叟東嶽行宮記宋真宗祥符九年有事泰山嶽神顯異詔天下

郡縣悉建東嶽行宮人始得以廟而作敬所遂安縣自始建迄今成毀興廢者屢矣大德丙午淳安

主簿尹公柔克來攝縣事勸助得中統鈔二千錠以資經始縣尉梁公廣承之興事逾月會主簿江公正初至遂安縣志明隆慶間知縣周恪萬厯間實相厥成

知縣馬呈鼎重修

國朝順治十五年邑民洪大道姚思稷等醵貲重建

龍王廟 遂安縣志在馬儀堰上明萬厯間知縣馬

呈鼎重建

三聖廟 新定續志在縣治南據王象之輿地紀勝

三聖廟即普州三景兄弟以死國列祀典神名思

忠思立思誼張魏公奏立廟和尚原宋時行都旌
忠觀亦有廟此又其別廟云

容公祠 遂安縣志明嘉靖三十一年知縣羅袞建

祀正德間捍寇知縣容九霄以元武畧將軍高裕

配享

余乾亨容公捍寇遺績碑正德癸酉饒寇王浩八等倡亂突入開化移據嚴坑將乘勝犯

遂其勢甚熾人無固心有上官奉令駐遂聞變嘆曰遂無城邊無屯民無可用何恃而守乘小舸逸去邑衆洶洶時容侯追及激以大義厲聲曰棄城失律國有典刑公必欲去吾且射公以殉卒還之民始定侯乃創城郭集民兵躬擐甲胄進至界據高立壘伐木立柵足未定而賊奄至即命果毅搏

之擒其先驅者三人賊憚侯武勇又四路為侯所
遏勢感宵遁西哨軍邀擊遂破之賊遁還故巢卒
就殄竟不能越遂尺地殺遂一人皆侯捍禦力也
遂之民至今思侯之功越四十年當吉水羅侯治
遂之八載始因民請為剏碑表章之又取勝國時
高千戶之有保障功者配享之斯舉也捍患之祀
足以合禮傳信之紀足以表忠不諱
之思足以存厚一舉而三善備焉

仁賢祠 舊浙江通志在邑西澗祀明吏部郎中毛

一瓚

姜習孔仁賢祠記遂巖邑也先是條編法行
編者聚從省費多有全書所未載者於是科

派濫觴吏緣為奸遂至不可究詰而里甲之禍始
烈惟公日擊科派胥役之害由於成規未立集邑
父老斟酌增益之不啻再三而條議呈焉務使額
有定設官無乏用胥無耗蠹可經久遠而後已此

一舉也真吾鄉百世之利微公力為條陳安望闔
邑之民霍然有起色哉捐館之日父老圖所以祀
公不佞何能揚其媿僅據
父老所請道其梗槩云爾

忠義節孝祠 忠義祠在聖廟儀門外東首節孝祠
在聖廟外西首

國朝雍正四年知縣曹維藩奉文建

壽昌縣

先農壇 在東門外七里廟東

國朝雍正六年知縣汪準奉文建立壇宇并置藉田四

畝九分

社稷壇 嚴陵志在縣西花園

風雲雷雨山川壇 嚴陵志在縣前溪南山上

邑厲壇 嚴陵志在縣北萬松山陰

城隍廟 壽昌縣志在縣治西南明洪武三年知縣

胡濬即舊基重建嘉靖庚子知縣顧公問撤而新

之丙午知縣程謨建前亭三間天啟三年廟燬知

縣封錫類重建

東嶽行祠 嚴陵志在縣東青龍山上東有聖水亭

王揆東嶽行宮碑粵若壽昌方五六十邑治之東青龍之山東嶽行宮靈蹟最著而天一之水聖母臨之苟冤枉被誣無所訴者質一泓之清泚聽兩詞之曲直如鑑之明而妍醜無逃情焉其興建年代因草莫考誌失之也若夫奕奕新廟以至元癸未尹尹子玉丞李應甫尉丁用重建暨達嚕噶齊阿里尹李炳助成新作南門則至順辛未達嚕噶齊旺扎勒布哈尹尹王之經營及兩廡之敝者修之闕者補之聖水則亭以覆之黜堊丹漆之崇邃嚴整至元再紀元乙亥冬十有一月揆來尹明年大旱宿廟下致禱甘澍輒應乃亦有秋於是合議所以答神明既僉謂聖母之宮獨仍其舊爰并葺之民吏翕讚徵工肇役乃作詩曰維邑壽昌龍山峙東於昭行宮神降岱宗誣枉孰辨臨此聖水奸欺

莫掄人獲神佑神依人立主宰所存功備生物有
嚴寢廟曰廡曰門神人具瞻完舊益新休於前政
惠我後人敢告
來者視此刻文

白山廟 嚴陵志在縣南白山洞下相傳神即漢司

徒吳融也五代梁龍德元年建宋崇寧二年勅封

靈應王方臘寇廟燬忠訓郎胡祖舜重建

洪國瑞
白山廟

記白石山巖危洞邃神其尸之天陰霧晦聞金石
音雲氣捲舒雨晴預卜伊山之麓有廟歸焉按新
定郡志言吳司徒廟也建於五代龍德元年封於
崇寧二年值方臘弗靜陷睦歛杭婺等州焚及於
廟博山依舊儀象儼然乃宣和三年也其
後建廟如初水旱疾疫之禱如響斯答

李都官祠 嚴陵志在縣西魏馱山神名頻邑人仕
唐為建州刺史卒而降靈其土建人立廟於梨山
以祀之累封至靈顯忠惠孚應佑德王今本邑魏
馱山及覺泉寺皆有神異數著靈跡而其在魏馱
者號唐賢靈祐王祠鄉人至今奉祀

蒼山廟 萬歷嚴州府志在縣東港口相傳唐時薇
州有薜商名蒼關者至此無疾而卒因降靈其土
民為立廟水旱禱之有應宋崇寧中封靈應侯

匹布夫人廟 壽昌縣志在縣東南白艾村相傳唐
末黃巢據縣治官軍討之阻溪水漲不得渡忽見
一女子滌布於水以布擲之化為長橋士卒履之
而過遂破賊復縣治事聞於朝勅封匹布夫人唐
宋列於祀典今鄉民皆祀之以祈蠶穀

忠義節孝祠 二祠俱在學宮東偏

國朝雍正五年知縣楊正荀奉文建

分水縣

先農壇 在縣南長淋坂

國朝雍正六年知縣蔡可遠奉文建立壇宇并置耜田

四畝九分

社稷壇 嚴陵志在縣西二里洪武八年建

風雲雷雨山川壇 嚴陵志在縣南洪武二十年建

邑厲壇 分水縣志在縣北門外

城隍廟 段天祐城隍廟記會稽林元素尹分水之

明年當元至正二年壬午以城隍久廢次第新之

踰月廟成嚴陵志在縣治西北明洪武三年知縣
余德賢即舊基重建正統十一年知縣李觀新之
成化十二年知縣龐璫復修東西兩廊

紫龍王廟 嚴陵志在縣西南十五里宋端平乙未
知縣趙師岩禱雨有應立祠山足以答神賜元泰
定間縣尹趙東州葺之至正二年縣尹林炳重建

段天祐紫龍山龍王廟記分水縣西南十五里曰
紫龍山山之巔舊有龍祠水出其傍下注為三池
邑人值歲旱輒請其水以禱相傳得池中生物肖
龍者則雨至正二年春旱夏更甚邑令林君齋沐

遵故事與龍約三日內雨當為龍更朔新祠翌日
雨驟澍三日迺止是歲大稔即捐俸市材鳩工而
民之趨之者施屋若干楹施
地若干畝未幾新祠告成

靈祐廟 嚴陵志在縣西二里廟本在柳栢鄉因祠

禱不便復廟於此

王禕靈祐廟記分水縣西二十里柳栢鄉有神祠曰靈祐按神

姓柳名不傳由河東徙居吳仕晉為內史出鎮新安以兵數萬禦寇境上未及返而歿靈輒至柳山下忽人馬辟易百夫挽之不動遂卜其地以葬邦人相與立廟而祀之廟在山之陽蓋山因神姓柳遂稱為柳山神既廟食茲土其護國庇民靈異之跡甚著環數十里內未嘗有橫逆之灾唐中和三年越州觀察使劉漢宏以兵攻郡城民禱於神大風雷拔其營柵夜傳柳公兵至皆遁去乾寧三年

江淮羣盜並起所至蹂踐畏神威不敢入郡境梁
開平四年邦人欲新廟未果暴風拔木壓棟宇盡
壞而神像獨存宋嘉定八年蝗大作民以急禱風
雷隨起驅逐靡遺稼田無害十二年大旱縣令潘
振走告祠下不旋踵而雨降歲則遂稔元至元十
九年廟傍民徐甲劫殺鄭丙而逃捕久不獲縣官
以告神已而徐甲自詣官若神使之者至大二年
鄉民郎慶失物不得賊巡檢王毅復以告夜夢神
手書晶字示之後三日而獲賊是歲大蝗民禱其
應如昔至正二年自春徂夏不雨官民合辭以禱
即大降雨三日鄰境大疫而縣以神故獨無死亡
其冬虎狼交道人畜被害甚多縣官移文於廟鄉
人間終夜人馬捕逐聲及旦而虎狼屏跡十三年
大盜羣起建德屬縣皆陷民計無所出惟神是訴
七月七日大風雨雹由是境上賊自潰賊復來焚
廟火三舉輒自滅縣官與賊戰於桐廬境賊見旗

幟遍山麓旗間悉柳字賊因大敗官軍移屯本縣
賊見旗幟如前皆奔突而去先是梁貞明四年以
吳越王錢氏之請封尚書左僕射廣福侯唐清泰
四年加封弘仁廣信王及宋賜廟號靈祐則嘉定
十一年也今縣大夫高君昌具述神之靈應與夫
封爵稱號皆出前代亦既上狀於朝請加錫命而
其本末猶未有紀載乃考圖志及傳聞之舊使來
徵文是用備書其實刻銘茲碑傳之無窮銘曰分
水之墟有廟翼翼有赫其神茲土是宅振威扶化
瀕洞烜赫助宣天休陰闔陽闢時踰千禩不替血
食相時人民灾害靡測凶有兵刃毒有灾疫亦有
蝗旱戕我稼穡我灾我患靡不屏跡僉曰嘻哉維
神之力神力孔多曷報之德春秋來享祀事敢忒
桂漿惟馨毛牲斯飶吹笙伐鼓左祝右珮咸罄厥
誠神用愉懌擁其慶祥布此福澤益庇我民護我
王國惟民戴神詎間今昔爰致其辭勒諸金石用

昭神靈永
示無極


東平王廟 分水縣志在縣東南四里九龍山上神
為張睢陽巡靈應赫然外邑趨禱者四時不絕

謝真人廟 分水縣志在縣東三里龍潭之上明太
祖嘗設醮緘密疏焚之真人於壇下俯伏久而甦
問之對曰三天門下觀見疏文誦之不遺一字封
得道真人後至龍潭端坐石上而化邑人立廟有
禱必應

忠義節孝祠 忠義祠在明倫堂東偏節孝祠在東

門外狀元坊

國朝雍正四年知縣胡杲奉文建



浙江通志卷二百二十四